

天一閣藏明代方志選刊

天一閣藏明代方志選刊

淳安縣志

ED56/16

一九六五年十一月中華書局
上海編輯所景印寧波天一閣
藏明嘉靖刻本原書版匡高二
一·九公分寬一三·六公分

重脩溇安縣志序

皇明御極監古定制郡邑皆有誌而會
其總于天下一統誌焉其文則載乎事
其義則資乎治故書序禹貢必曰聲教
所及序周官必曰任官惟人孔子論夏
殷之禮必欲文獻為徵然則有官奇者
豈直欲知沿革山川食貨貢賦興諸已
往之跡而已必當因文求義興人才正

風俗敦教化崇表名宦鄉賢扶植忠孝
節義以感發人心挽世運於隆古斯可
焉嗚呼誌之裨於政教大矣不亦有資
於治耶溥為邑隸嚴郡由古迄今沿革
凡六易名雖山川財賦不異而風俗之
厚人土之出挺拔東南名儒碩輔唐有
皇甫湜宋有錢騷堂方蛟峯黃警齋我
朝有商文毅胡莊懿徐康懿皆以文章德

業相望後先彬彬其盛矣然自成化丙申逮今踰四世紀未有續所以迺休聲以永文獻之傳不有待乎嘉靖壬午蕭田姚侯景雍以名進士來尹政教誕敷其於人才風俗教化名宦鄉賢尤憺憺加之意越明年政成化行悅然曰期會簿書有司未務而文獻所闕則邑誌也其可忽諸會

朝廷下纂修之令銳意重脩乃稽輿論酌
故典參先賢著述諮于儒紳余君殊載
黃君彥通僚佐邵君宗範庠生方祚相
與考訂校編正其訛補其闕闡其幽發
其牽舛有關於名教者彥之甄別褒斧
直而核詳而明誠為一邑之信書以備
我

皇明天下一統之全誌後之系宦者觀風

寧不撫卷興懷而企勵哉故觀建置沿革則思興時宜之觀山川形勝則思因地畛之觀民風土俗則思化理之觀學校科貢則思作興之觀名宦政績則思匪休之觀鄉賢德望則思景行之觀戶口食貨則思富庶而貢獻之觀孺寡孤獨有養則思賑卹而哀矜之是則斯誌也上有以昭

聖代圖輿之盛下有以啓人心感動之機
不徒爲今日文獻計且將爲後來政事
資其有係於治理豈小補云姚侯學博
才膽駿二柄用脩誌特其善政之一耳
子言溥人也喜其成而僭序焉

嘉靖三年歲次甲申季冬朔旦廣東布
政使司左布政使陳情致仕邑人王子
言謹書

重脩淳安縣志引

嘉靖壬午歲適

聖天子御極之初分遣進士往天下藩臬采取民風節義凡諸一統志所關者莫不廣求博載以備

武宗毅皇帝實錄誠盛心也浙藩奉命而來者則年友陸君鰲孫君巒也凡各府州縣率皆稽諸誌書所載耳目所見聞者以折衷之淳爲嚴屬縣而誌書則近有闕焉鳴鸞出牧于淳道經留都第鳴鳳官太常寺博士因接諸淳鄉宦皆道誌書一錄爲淳之缺典矧今又值

朝廷纂脩之期會是誌也其可久墜而不脩乎惕然
于衷者久之及蒞任以來詢之鄉故老及諸世家
之所自紀錄者始得其似猶未究其真也又稽諸
輿論審諸故典及府誌云所畧節未備者莫不因
而叅詳之蓋嚴一郡為隸六縣言其人材之盛莫
過於淳言其財賦之多莫過於淳言其風俗之淳
厚亦莫過於淳淳為歙東鄉僻居山隅幅員相距
凡四百餘里率皆高山峻嶺環峙聳立峯迴路轉
險阻難夷而縣治則倚山為城臨水為池田賦則
夏絹多而秋糧少民貧俗儉文風日盛實自先賢

錢融堂黃警齋方蛟峰商素庵諸先生倡之也近
承纂脩之命牒縣儒學以舉行之僚佐則丞爲邵
洪尉爲胡琬幕爲吳鳴鳳掌教則余坤司訓則黃
講朱韓皆同心以力贊之焉者也余政暇間披閱
府誌徧採諸舊籍之所藏及名賢著述之貽諸後
凡有關於風化者皆備書而悉紀之示實錄也若
恃亂有乖於名教焉者則削之畧之昭直筆也是
誌成於

聖天子纂脩之會出於士大夫論議之公凡若干卷若
夫梓行而傳之者則諸人責也於余何有哉

嘉靖甲申歲秋九月既望之吉

賜進士出身文林郎知淳安縣事莆田雲洲姚鳴鸞

謹識

淳安縣志序

洪惟我

朝

列聖相承仁覆海宇凡尺地一民莫非所有在天下有
一統志在列郡有郡志在各縣有縣志皆以實錄
卓乎足徵者也然而顯晦者由乎人盛衰者因乎
時有爲於前不可無述於後此志之所由以續也
歟淳安爲邑隸嚴郡實子陵之鄉山不甚高而秀
水不甚多而清地狹民稠人和物阜古稱輯睦多
文學之士良有以也縣志舊有刻板散逸殆盡缺

而不脩者蓋亦有年郡侯淮南朱公暄由內臺擢是任適以是事檄縣縣令廣信汪君貴祗事惟謹亦曰蒞政以來恒念以爲缺典意亦猶朱公也殆所謂閉戶造車出門合轍者哉以予閑居委任其事於是前撫舊志所載後則採輯品第精別仇較非可據者不取書旣成謂宜序予惟地方有志所以紀其山川人物土地貢賦風俗之顯晦盛衰不可無也然備之或近誣畧之或失實亦難矣哉禹貢僅千百言九州八荒昭然可見後有作者雖皆取法不能無議矧顯晦盛衰關乎氣運非偶然也

方

今重熙累洽治隆往古人其人時其時矣可不大書
特書以鳴我

國家氣運之盛

成化十二年丙申夏六月丁丑

賜進士出身奉政大夫脩正庶尹尚書兵部郎中致
政邑人吳福書于青溪書院

